

Cingsih Yen Gyauyuz Daibyauidonz Daengz Vanzgyangh Camgya Cuengh Gun Song Sawvah Sonhag Yawjhag Hozdung

靖西县教育代表团到环江参加壮汉双语教学观摩课



▲ Yozyoz vwnzyi daibyauidui ndaw hagdangz diuq foux 《Aenswx Iq》.

◀ Vanzgyangh Mauznanzcuz Swciyen Gyau-yuzgiz fugizcangj Lanz Yiz (baihswix boux daihsam) gaisau Vanzgyangh hong song sawvah sonhag gingniemh.



▲ Yozcenzbanh lauxsae Vanz Denzcwng son hagseng doeg Sawcuengh.



▲ Boux hagseng yozcenz-banh hwnj daiz guh daez lienziensiq.



▲ Gyoengq doengzhag diuq foux faexsax.

4 nyied 16 hauh, Cingsih Yen Vadung Cin Cunghsinh Siujyoz 19 boux lauxsae, youz yienh de gyauyuzgiz Couh fugizcangj daiq doih, daeuj daengz Vanzgyangh Mauznanzcuz Swciyen Swh'wnh Cin Yinzhoz Siujyoz guh Cuengh Gun song sawvah sonhag yawjhag hozdung.

Aen yawjhag hozdung neix, gungh faen baenz sam aen bouhfaenh daeuj gawhengz. Bouhfaenh daih' it dwg haeuj ndaw bangaep bae dingq goq, cujyau dingq le yozcenzbanh "Angqyangz Hag Sawcuengh" caeuq ngeih nienzgaep goq Sawcuengh. Ndawde, yozcenzbanh go sonhag youz Yinzhoz Siujyoz Vanz Denzcwng lauxsae son, ngeih nienzgaep youz Yinzhoz Siujyoz Cinz Yivangj lauxsae son. Bouhfaenh daihngaih dwg hagseng Yinzhoz Siujyoz guh dagogenh hozdung baijyienj, cujyau baijyienj

le hagseng diuq foux faexsax, daenj haizgieg doxdax, gveng aendomq, gwih maxgyaeg, dwk geizdoj, geij cungj hozdung neix guh liux le, gyoengq hagseng lij hawj gyoengq daibyauidonz yienj 6 aen cietmoeg gig miz minzcuz daegsaek haenx, ndawde miz hagseng yozcenzbanh byaujyienj, miz yozyoz vwnzyi daibyauidui byaujyienj, miz ciengq miz diuq, miz yungh Vahcuengh ganggoj, yungh Vahcuengh eu fwen daengj. Bouhfaenh daihsam dwg guh gyauhliuz ginghyen veibau hozdung. Swh'wnh Cin Cunghsinh Siujyoz Mungz Ningz yaucangj sien daibyauij Swh'wnh Cin gaisau miz-gven cunghsinh siujyoz baenzlawz cujiz Sawcuengh hagdangz guh hong Cuengh Gun song sawvah sonhag, Yinzhoz Siujyoz Luz Yinzhwz yaucangj daibyauij hagdangz gyoengqde gaisau bingzseiz ndaw hagdangz baenzlawz giethab

minzcuz daegsaek guh dagogenh hozdung, baenzlawz laebguh hagdangz minzcuz vwnzva gensez, Vanzgyangh Mauznanzcuz Swciyen Gyauyuzgiz Lanz Yiz fugizcangj hawj Cingsih Yen gyauyuz daibyauidonz gaisau mizgven Vanzgyangh hong minzcuz gyauyuz sonhag, doeklaeng Cingsih Yen gyauyuzgiz Couh fugizcangj hix gaisau Cingsih Yen mizgven gyauyuz cingzgvang, lij ganggangj gij souhaeuj caeuq gamjsouh baez yawjhag hozdung ndaej daengz de.

Vanzgyangh, Cingsih song aen yienh guh baez Cuengh Gun song sawvah sonhag hozdung neix, hawj gyoengq lauxsae song aen yienh neix engqgya yawjnaek hong Sawcuengh sonhag, gyoengq lauxsae cungj laeb gietsim, itdingh dawz Sawcuengh sonhag guh ndei guh ak bae.

(Mungz Ningz Luz Gaisenj/ 蒙宁 陆介选)



▲ Yinzhoz Siujyoz Cinz Yivangj lauxsae hawj ngeih nienzgaep hagseng hwnj dangz Sawcuengh.



▲ Gyoengq lauxsae Cingsih Yen haeusim sisi dingq banyozcenz hwnjdangz.

◀ Gyoengq hagseng youq seiz roengzdangz guh bau aendomq doxdax.